

E raport di Deloitte & Touche no ta muestra otro

NICOLAAS TABATA POR EXPRESA SU DUDA RIBA EXPANSION DI AEROPUERTO

ORANJESTAD(AAN) -- Juez den un forma hopi cla ta muestra cu no tin ningun motibo cu ta conduci na Aruba Airport Authority (A.A.A.) pa haci un peticion pa termina e relacion di trabao cu e director di aeropuerto Michael Nicolaas. DIARIO a publica e opinion di Nicolaas y Bikker encunto e decision pero door cu a haya e sentencia laa, awe ta publica e contenido di e sentencia di Nicolaas y den un otro articulo e contenido di e sentencia di Bikker.

Segun e raport di Deloitte & Touche, e preocupacion cu Nicolaas, encabezando e management team, a expresa esta cu e proyecto di expansion di nos aeropuerto no ta realisabel, ta un diferencia di vision entre Nicolaas y hunta di comisario di A.A.A. Ta asina cu anteriormente diferente biaha Nicolaas a expresa su preocupacion na A.A.A. encunto e proyecto y door cu e no tabata haya atencion el a dicidi di traha un carta caminda e ta expresa un biaha mas su preocupacion.

Juez a muestra cu for di e raport cu Deloitte & Touche a traha pa A.A.A. encunto e proyecto di expansion di aeropuerto y cual proyecto ta sostene e forma di pensa di A.A.A., no por saca afor cu intencionalmente Nicolaas riba dia 11 of 29 di November 1997 a duna informacion incorrecto of a haci expresionnan infunda tocante su preocupacion.



Deloitte & Touche a traha e raport despues cu Nicolaas a expresa su preocupacion. Ademas Juez ta muestra cu e raport no ta precedente di un instancia no partidario mescos cu Nicolaas a remarca ya cu e compania ta envolvi den tumamento di decision di e proyecto.

Juez a rechaza e ponencia di A.A.A. cu Nicolaas a nenga di argumenta su dudanan riba

realisacion di e proyecto ora cu A.A.A. a puntr'e pa haci esaki. Juez ta haya cu Nicolaas a muestra A.A.A. cu e hunto cu e resto di management team ta dispuesto pa argumenta nan preocupacion pero cu nan mester di mas tempo. No por exclui cu door di e suspension Nicolaas no a haya e oportunidad di argumenta su preocupacion.

Juez ta haya cu e carta di Nicolaas fecha 16 November 1997 na tur personal di A.A.A. a haya tocante su suspension, no tabata asina tendencioso y cu a causa asina daño na A.A.A. cu ta duna A.A.A. motibonan pisa pa caba cu e relacion di trabao cu Nicolaas. El a sigui bisa cu e publicacion di e carta por a haci daño na A.A.A. pero esaki tabata asina limita cu e riesgo di e daño aki ta hustifica ya cu e meta tabata pa muestra su preocupacion riba e strategia cu A.A.A. y pa defende su mes. Juez no ta haya cu esaki ta un motibo urgente pa termina e relacion di tra-

baio cu Nicolaas.

Juez a muestra cu ta Nicolaas su trabao como director di aeropuerto pa muestra e hunta di comisario di A.A.A. riba cosnan cu e ta sospecha cu no ta bay bon.

Nicolaas a muestra den Corte cu e contract cu el a firma cu RUST caminda A.A.A. mester paga 338.166.-- Dollar ta basa riba consejo di abogado di A.A.A. na Merca y cu e decision anterior tuma di hunta di comisario encunto e consejo aki. Juez ta haya cu apesar cu esaki a socede sin e autorisacion necesario di hunta di comisario, esaki no ta un eror grave cu ta duna motibo urgente pa termina e relacion di trabao cu Nicolaas.

Juez tambe a muestra cu ta evidente cu e organisacion administrativo di A.A.A. no ta corecto. Tambe ta evidente cu bao direccion di Nicolaas a tuma pasonan pa drecha e organisacion. E ta haya cu door di e hecho cu ta na Januari 1997 Nicolaas como

director a haya man liber pa drecha e situacion, no por culp'e di e situacion reinante den e organisacion administrativo di A.A.A.

Juez ta di opinion cu no tin motibonan urgente pa termina e relacion di trabao cu Nicolaas. Si a keda constata cu tin un mal comunicacion entre di un banda Nicolaas y e resto di management y di otro banda hunta di comisario di A.A.A.

Juez ta haya cu ta evidente cu A.A.A. mester tin un bon relacion di trabao cu e diferente funcionarianan y organonan cu conhuntamente ta forma e dirigencia di aeropuerto. E no ta haya ta husto pa termina e relacion di trabao cu Nicolaas. Juez su conclusion ta cu e ta rechaza e peticion di A.A.A.

Manera ya DIARIO a publica, Nicolaas a expresa cu e ta dipuesto pa reanuda trabao y ta kere cu mester bin un reunion caminda e partidonan lo bay stipula reglanan pa tin un bon forma di traha cu otro.

ECLIPSE SYNDROME!!



DEN JUANA MORTO A HAYA UN HOMBER CASI MORTO

ORANJESTAD (AAN): Den oranan di merdia, Central di Polis, a dirigi Patruya den Juana Morto na un cas. Polis a topa den e cas un homber benta na suela.

E homber tabata tin un cap na altura di su wowo robez, cara y tambe orea.

Patruya a solicita mesora pa ambulans, cu a transporta e victima direccion Policlinica. Ta trata di e homber di inicial R.B. di 71 aña di edad.

Den e relato policial no ta menciona si e victima lo por a bira malo of ta trata aki di un caso di violencia.